

Illunut sanaqataaffiusunut taarsigassarsiat pillugit Inatsisartut inatsisaat

Kapitali 1

Atuuffia

§ 1. Inatsisartut inatsisaat manna inigineqartussatut aalajangerneqarsimasunik illunik sanaqataaffigisanik sanaartornermut pissarsinermulluunniit taarsigassarsianut atorineqarpoq.

Imm. 2. Nunaqarfinni illoqarfinnilu tamani, Ilulissat, Aasiaat, Sisimiut, Nuuk aamma Qaqortoq minillugit, Inatsisartut inatsisaat manna naapertorlugu illunik sanaqataaffiusunik sananissamut imaluunniit pisinissamut taarsigassarsitisisoqarsinnaavoq.

§ 2. Illunut sanaqataaffiusunut kommunalbestyrelsi taarsigassarsitisissaaq.

Imm. 2. Kommunalbestyrelsi inunnut nammineersinnaassusilinnut aamma illoqarfimmi imaluunniit nunaqarfimmi illumik sanaqataaffigineqartussami imaluunniit sanaartorfigineqartumi inuit nalunaarsorsimaffianni najugaqartutut nalunaarsorsimasunut taarsigassarsitisisinnaavoq.

§ 3. Inuussutissarsiummik ingerlatsiviusumiit imaluunniit ingerlatsiviusussamiit illumik sanaqataanermut taarsigassarsitisisoqarsinnaanngilaq, taamaattoq tak. imm. 2.

Imm. 2. Illumi sanaqataaffigineqartussami inuussutissarsiutit namminersorfiusut mikinerusunik ingerlatsisunut taarsigassarsitisisoqarsinnaavoq.

§ 4. Inatsisartut inatsisaat manna malillugu illunik sanaqataanermut taarsigassarsitisinerup peqatigisaanik inissianut pisortat tapiissutaat atorlugit inatsisit allat malillugit tapiissutisisoqarsinnaanngilaq.

Imm. 2. Illoqarfinni nunaqarfinnilu pisortat attartortitsinermi inissianik atorneqanngitsunik peqarfiusuni imaluunniit illunik sanaqataaffigisanik imaluunniit nammineq illulianik, inissianut attartortittakkanut innersuussinissamut piumasaqaatinik naammassinnittunik, najugaqarfigineqanngitsunik peqarfiusuni, illunut sanaqataaffiusunut nutaanut sananermut taarsigassarsitisisoqarsinnaanngilaq, taamaattoq tak. § 7.

§ 5. Illup sanaqataaffigisap piffissami sanaartorneqarnerani sanaartornermut pilersaarusiornermilu inatsisinik atuuttunik naammassinnittunik sanaartornernut taamaallaat taarsigassarsitisisoqarsinnaavoq.

§ 6. Illunut sanaqataaffigisanut nutaanut pituttuisumik sanaartornissamut isumaqatigiissuteqarfioreersimanngitsunut imaluunniit sanaartornernut aallartinneqareersimanngitsunut taamaallaat taarsigassarsitsisoqarsinnaavoq, taamaattorli tak. § 7.

Kapitali 2

Pissarsinermut aamma illunut sanaqataaffiusunut taarsigassarsineq

§ 7. Kommunalbestyrelsimiit taarsigassarsiarititat illup sanaqataaffiusup nutaap sanaartorneranut atorineqarsinnaapput.

Imm. 2. Kommunalbestyrelsi illumik sanaqataaffiusumik pissarsinermut taarsigassarsititsisinnaavoq aamma naammassillugu sanaartorneqarsimanngitsumik tigusinissamut taarsigassarsitsisinnaalluni.

Imm. 3. Kommunalbestyrelsi taamaallaat illunik sanaqataaffiusunik akuerisanik sananermut pissarsinermulluunniit taarsigassarsititsisinnaavoq, tak. § 35.

Imm. 4. Naalakkersuisut qinnuteqaatinut suleriaatsit, piffissamut killiliussat, qinnuteqaatinut immersugassat suliarineqartarneri aammalu assigiissaartunik atuisarnissaq pillugit maleruagassanik aalajangersaasinnaapput.

§ 8. Kommunalbestyrelsi § 7, imm. 1 malillugu illumik nutaamik sanaqateqarnermi ikkussugassat pisarneq naapertorlugu aaqqissuunneqarsimasunik sumiiffimmilu ikkussugassatut tunniunneqarsimasunik pissarsinermut aningaasartuutitut uppersarnarneqarsimasunut tamarmiusunut taarsigassarsititsisinnaavoq, tak. § 10.

Imm. 2. Kommunalbestyrelsi § 7, imm. 2 malillugu illuni sanaqataaffiusuni pioreersuni sulii naammassillugu sanaartorneqanngitsuni sumiiffimmi saniatigut atortussanik pisariaqartunik tunniunneqarsimasunik pissarsinermut aningaasartuutitut uppersarnarneqarsimasunut tamarmiusunut taarsigassarsititsisinnaavoq, tak. § 10.

Imm. 3. Kommunalbestyrelsi § 7 malillugu toqqavissap pilersaarusiorderneranut sanaartorneranullu, sanaartoqataasumit ikiortinnermut aamma ilitsersuisumit ikiortinnermut kiisalu innaallagissap, erngup imaluunniit kiassarnerup aqutaasa ikkussornerinut aningaasartuutitut uppersarnarneqarsimasunut tamarmiusunut taarsigassarsititsisinnaapput, tak. § 10.

Imm. 4. Naalakkersuisut paasissutissanik ilassutaasussanik piniartarneq pillugu maleruagassanik aalajangersaasinnaapput.

§ 9. § 7 malillugu kommunalbestyrelsimiit taarsigassarsiat ernialersorneqanngitsutut akilersugassaanngitsutullu taarsigassarsiaapput.

Imm. 2. Taarsigassarsiat ukiuni 20-ni akilersugassaapput. Taarsigassarsiat ukiut tamaasa assigiimmik akilersorneqarlutik taarsigassarsiat akilersorneranni assigiittumik annertussuse-qartunik appartinneqartassapput.

§ 10. Kommunalbestyrelsip § 7 naapertorlugu taarsigassarsiaritissinnaasaasa annerpaaffissaat qinnuteqartup inoqutaasalu, kiisalu qinnuteqartup illumilu sanaqataaffiusumi inoqutissaasa ukiuni naatsorsuiffiusuni kingullerni tallimani isertitaat akileraarutaasussat agguaqatigiissinneqarnerat tunngavugalugit naatsorsorneqassapput.

Imm. 2. Kommunalbestyrelsimiit taarsigassarsiat § 7 malillugu aningaasartuutit uppernarsar-neqartut tamarmiusut 95 procentii tikillugit annertussuseqarsinnaapput.

Imm. 3. Qinnuteqartoq § 7 malillugu aningaasartuutit uppernarsarneqartut tamarmiusut 5 %-iannik nammineq akiliutissamik tunniussisinnaassaaq.

Imm. 4. Kommunalbestyrelsimiit taarsigassarsiat qinnuteqartup ukiumoortumik inoqutigiinni isertitai akileraaruserneqartussat agguaqatigiissinneri 300.000 kr.-it sinnerpagit, 5.882,00 kr.-it tamaasa 1 procentpointinik appartinneqartassapput.

Imm. 5. Qinnuteqartup inoqutigiinni isertitai akileraaruserneqartussat agguaqatigiissinnerini 600.000 kr.-it sinnerpagit, kommunalbestyrelsi inatsit manna malillugu taarsigassarsisitsisinnaanngilaq.

§ 11. § 7 malillugu kommunalbestyrelsimiit taarsigassarsiat qinnuteqartup aningaasartuutit taarsigassarsiffiusinnaasut kiisalu sanaartorfigissaanermut aamma pisortat piumasaat malillugit innaallagissamut, imermut kuuffinnnullu atassusernermut aningaasartuutit tamarmiusut nammineq akiliutissaminik nammineerluni aningaasalersuisimappat tamatumunngalu uppernarsaammik saqqummiussippat taamaallaat taarsigassarsiarineqarsinnaapput.

Imm. 2. § 7 malillugu kommunalbestyrelsip taarsigassarsisitsinissamut neriorsuutaanut piumasaqaataavoq taarsigassarsinissamut pisinnaatitaaffiusut aningaasartuutinit tamarmiusunit taarsigassarsisup nammineq akiliutai pillugit taarsigassarsisup akiliisimanermut qularnaveeqqusiinissaa.

Imm. 3. Naalakkersuisut pissutsit qinnuteqartumi immikkut pingaartinneqartussat pillugit maleruagassanik aalajangersaasinnaapput.

§ 12. Taarsigassarsisup nammineq aningaasalersuinerminut taarsigassarsiarisinnaasai, kiisalu sanaartorfigissaanermut aamma pisortat piumasaat malillugu innaallagissamut, imermut kuuffinnnullu atassusernermut aningaasartuutinit uppernarsarneqartunut taarsigassarsisup taarsigassarsiarisinnaasai allat illumi sanaqataaffiusumi qularnaveeqqusiinikkut isumannaarneqarsinnaapput.

Imm. 2. Kommunalbestyrelsimiit taarsigassarsiat illumi sanaqataaffiusumi qularnaveeq-qusiisoqarneratigut isumannaarneqassapput. Kommunalbestyrelsimiit taarsigassarsiat, taarsigassarsisup nammineq aningaasalersuineranut kiisalu sanaartorfigissaanermut aamma pisortat piumasaat malillugu innaallagissamut, imermut kuuffinnnullu atassusernermut aningaasartuutinit uppernarsarneqartunut taarsigassarsisup taarsigassarsiarisinnaasaanut allanut taarsigassarsiat, illumi sanaqataaffiusumi isumannaarneqartut ataqqissavaat. Kommunalbestyrelsip taarsigassarsiarititai illumi illulioqataaffiusumi qaffatsinneqarlutik qularnaveeqqutaasinnaapput.

§ 13. Ukiuni akileraarfiusuni inaarutaasumik akileraarusiiffiusuni kingullerni tallimani inuussutissarsiuteqarlutik ingerlataqarsimanngitsunut inunnut kommunalbestyrelsi taarsigassarsisitsisinnaanngilaq.

Imm. 2. Imm. 1-imi killiliussat apeqqutaatinnagit kommunalbestyrelsi ilinniartunut, ilinniakkaminnik naammassinnissimasunut, aammalu ilinniarnertik peqqutigalugu ukiuni akileraarfiusuni kingullerni tallimani sulisimanngitsunut taarsigassarsititsisinnaavoq.

§ 14. Inunnut illumik pigisaqareersunut imaluunniit inigisassatut aalajangersarneqartunut illumi piginneqataasunut aamma Namminersorlutik Oqartussat imaluunniit kommunalbestyrelsip

taarsigassarsisitsiffigisimasaanut, sulit tamakkerlugit akiliisimanngitsunut kommunalbestyrelsi taarsigassarsisitsinnaangilaq.

Kapitali 3

Oqartussaaffissamik killiliineq, atuineq il.il.

Piginnittussaataitaneq atulerneralu

§ 15. Taarsigassarsisup § 7 malillugu ullormi taarsigassarsinissamut neriorsuummik tunineqarnerminiit ukiut marluk qaangiutsinnagit illu sanaqataaffiusoq naammassimanngippagu atulersimanngippagulu siumoortumik ilisimatitsinertaqanngitsumik taarsigassarsinissamut neriorsuut atorunnaarsinneqassaaq.

Imm. 2. Imm. 1-imi allanneqartumit piffissamik killiliinermit immikkut pisoqartillugu kommunalbestyrelsi immikkut akuersisinnaavoq.

Imm. 3. Illumi sanaqataaffiusumi naammassillugu sanaartorneqarsimasumi qularnaveeqquteqartumik kommunalbestyrelsimut inaarutaasumik qularnaveeqqusiussaqluni taarsigassarsinermi allagartamik inaarutaasumik taarsigassarsisup peqalernissaata tungaanut tamannalu naqqiutitaqanngitsumik Kalaallit Nunaanni Eqqartuussivimmi nalunaarsorneqarpat kommunalbestyrelsi atortunut tunniunneqartartunut tamanut kiisalu illumut sanaqataaffiusumut sanaartorneqartumut kommunalbestyrelsi piginnittussaataitavoq, tassunga ilanngullugit nalilinnut aamma taarsigassarsisup sulinermini imaluunniit illumi sanaqataaffigisamini aningaasaliisimanerani pilersinneqarsimasuni.

Imm. 4. Illumut sanaqataaffiusumut piginnissinnaatitaaneq taarsigassarsisumut tunniunneqarsinnaanngippat, kommunalbestyrelsip taarsigassarsisup sanaartorfissagissaanermut aammalu imm. 3 naapertorlugu pisortat innaallagissamut, imermut kuuffeqarfimmullu atassusiinissamut piumasaqaataannut aningaasartuutit taarsissavai.

Najugaqartussaataitaneq attartortitsinerlu

§ 16. Illumik sanaqataaffiusumik, Inatsisartut inatsisaat manna naapertorlugu taarsigassarsititsiviusumik piginnittoq illumi sanaqataaffiusumi najugaqarnissamut pisussaaffeqarpoq aamma illumi sanaqataaffiusumi inuit nalunaarsorsimaffianni najugaqartutut nalunaarsorsimassallutik, taamaattorli tak. §§ 17-18.

Imm. 2. Illu sanaqataaffiusoq illumi piginnittumit imaluunniit inummit piginnittup inoqutaanut ilaasumit ukiumut minnerpaamik ulluni 180-imi najugaqarfigineqarpat, najugaqartussaataitaneq naammassineqarsimassaaq.

§ 17. Illumik sanaqataaffiusumik, Inatsisartut inatsisaat manna naapertorlugu taarsigassarsititsiviusumik piginnittup, piginnittup taassumaluunniit inoqutaasa utaqqiisaasumik peqannginnerani, najugaqarfiginngikkallarsinnaavaa imaluunniit inunnut nammineersinnaasunut illu sanaqataaffiusoq attartortissinnaavaa. Qaammatinik pingasunik sivikinnerusumik imaluunniit qaammatinik aqqaneq marlunnik sivisunerusumik attartortitsisoqarsinnaanngilaq, taamaattoq tak. imm. 2.

Imm. 2. Imm. 1-imi piffissami killiliineq apeqqutaatinnagu, piginnittup illu sanaqataaffiusoq piffissami sivisunerusumi najugaqarfiginngikkallarsinnaavaa imaluunniit attartortissinnaavaa, piginnittup

inoqutaasaluunniit peqannginnerat utaqqiisaasumik pippat ukuninngalu peqquteqarpat:

- 1) napparsimaneq,
- 2) ilinniarneq,
- 3) inissiisarfimmut inissinneqarneq,
- 4) innuttaasuni suliaassanik isumagisaqarneq, imaluunniit
- 5) piginnittup nammineerluni imaluunniit piginnittup inoqutaasa ilaata nuutsinneqarallarnera-nik.

Imm. 3. Attartortitsinermik isumaqatigiissut tassanilu piumasaqaatit attartortup attartukkamik tigusinissaa sioqqullugu kommunalbestyrelsimit akuerineqarsimassaaq, tak. § 18.

Imm. 4. Illumik sanaqataaffiusumik piginnittoq kommunalbestyrelsemut nalunaaruteqassaaq piffissami qaqugukkut illu sanaqataaffiusoq najugaqarfigneqanngikkallarnissaanik, tak. imm. 2.

§ 18. § 17 naapertorlugu attartortitsinermi attartortitsinermut isumaqatigiissut Naalakkersuisunit akuerisaq atorineqassaaq.

Imm. 2. Ineqarnermut akiliutit piumasaqaatillu pisortat inissiaataannik attartortittakkanik attartortitsinermut maleruagassat sukkulluunniit atuuttut naapertorlugit aalajangersarneqartassapput.

Imm. 3. Attartorneq pillugu isumaqatigiissummi pequtit ilaappata akiliineq aningaasanut qaffasinnerusunut aalajangersarneqarsinnaavoq, taamaattorli annerpaamik ineqarnermut akiliummut naapertuuttoq 10 %-inik ilallugu.

Imm. 4. Attartortitsineq pillugu isumaqatigiissummi piumasarineqassanngilaq attartortup piginnittumik allanik isumaqatigiissuteqarnissaa. Taamatut ittunik isumaqatigiissutit atuuttuunngillat. Attartorneq pillugu isumaqatigiissut atuutissaaq, tassungali atasumik piumasaqaateqarnani.

Imm. 5. Illumik sanaqataaffiusumik attartortup attartukkani inummut allamut attartortissinnaanngilaa. Attartortoq attartortitsippat imaluunniit attartorneqartunik atuineq allanut atugassanngortippagu kalerriisoqqaarnani attartorneq pillugu isumaqatigiissut atorunnaassaaq attartortullu illu sanaqataaffiusoq ingerlaannartumik qimassallugu. Taamaattoqartillugu piginnittup illu sanaqataaffiusoq nammineq najugaqarfignissavaa.

Eqqartuussivikkut malersuineq aamma taarsigassarsianut qularnaveeqqusiineq

§ 19. § 7 malillugu taarsigassarsinerit suulluunniit tamakkerlugit nalikillilernissaasa imaluunniit akilernissaasa tungaannut, illumut sanaqataaffiusumut oqartussaannikkut killiliinerit uku atuutissapput:

- 1) Illumi sanaqataaffiusumi eqqartuussivikkut malersuisoqarsinnaanngilaq.
- 2) Illu sanaqataaffiusoq taarsigassarsinermi qularnaveeqqutitut atorineqarsinnaanngilaq, taamaattorli tak. § 12.

Imm. 2. § 12-imut ilaasunut piumasaqaatinut isumannaarinermut qularnaveeqqusiussaqarluni taarsigassarsinermi allagartaq tunngavigalugu imm. 1 eqqartuussivikkut malersuineri atorineqarsinnaanngilaq.

Imm. 3. Sillimmasiisarfik, illup ikuallattoornissaanut sillimmasiiffiusoq, imm. 1 apeqqutaatinngu, sillimmasiineri akiliutissanut ernialersorneqartunut aningaasartuutinullu allanut qularnaveeqqusiussaminut pisinnaatitaaffeqarpoq. Sillimmasiisarfik aamma ullormit akiliiffissamit ukiumi

ataatsimi qularnaveeqqusiiffigisanut allanut siulliulluni illumi sillimmaserneqartunik akiliutissanut qularnaveeqqusiussanut pisinnaatitaaffeqarpoq.

Piginnittut nikinneri

§ 20. § 7 malillugu taarsigassarsiat piginnittut nikinnerini akiligassanngussapput, taamaattorli tak. imm. 2 aamma § 21, imm. 2.

Imm. 2. § 7 malillugu taarsigassarsiat piginnittut nikinnerini akiligassanngussanngillat:

- 1) taarsigassarsisumiit taassuma aappaanut imaluunniit inooqataanut, imaluunniit
- 2) taarsigassarsisup toqunerani taarsigassarsisup kingornussisussaanut.

Imm. 3. Inooqataasutut isigineqarpoq inuk piginnittut nikinneri sioqqutitsiarlugu sivikinnerpaamik ukiuni marlunni taarsigassarsisumit inoqutaalluni inuit nalunaarsorsimaffiani nalunaarsugaasimasoq.

§ 21. Taarsigassarsisup illu sanaqataaffusoq tuniniassaguniuk, sumiiffimmi atuagassiami atugaanerpaasumi nunalu tamakkerlugu aviisimi ikinnerpaamik ataatsimi tamanut ammasumik nalunaaruteqarnikkut illu sanaqataaffusoq tuniniassavaa.

Imm. 2. Illup sanaqataaffusup tunineqarneranut atasumik kommunalbestyrelsimut akiitsut sinneri akilernerqassapput imaluunniit taarsigassarsinermi piumasaqaatit allanngortinnagit piginnittumit nutaamit tiguneqassallutik.

§ 22. Taarsigassarsisup kingorna illu sanaqataaffusoq § 21 naapertorlugu tunisinnaanngippagu, kommunalbestyrelsip isumaqatigiissuteqarnikkut akiitsut sinnerinut naapertuuttumik akiliuteqarluni illu sanaqataaffusoq tigusinnaavaa.

Akiligassanngortitsineq taarsigassarsianillu tigusineq

§ 23. § 7 malillugu kommunalbestyrelsimut taarsigassarsiat akiligassanngortinneqassapput:

- 1) taarsigassarsisoq illumik sanaqataaffusumik illersorneqarsinnaasumik aserfallatsaaliisimannngippat, paasineqarpallu kommunalbestyrelsip qularnaveeqqusiinikkut isumannaagai ajornerulersinneqartut,
- 2) taarsigassarsisup ikuallattoornissamut illullu ajoqusersinnaaneranut illu sanaqataaffusoq sillimmasersimannngippagu, tak. § 34,
- 3) taarsigassarsisup illu sanaqataaffusoq tamakkiisumik ilaannakuusumilluunniit isaterpagu,
- 4) illumi sanaqataaffusumi inuussutissarsiornermut ininik aaqqissuussisoqarpat imaluunniit illumit sanaqataaffusumiit inuussutissarsiummik ingerlatsisoqarpat. Inuussutissarsiutilli namminersorfusut mikinerusut ilaatinneqanngillat, tak. § 3. imm. 2,
- 5) taarsigassarsisup najugaqartussaataaneq malinngippagu, tak. § 16,
- 6) taarsigassarsisup illumik sanaqataaffusumik kommunalbestyrelsip misissuinissaanut itigartitsisimalluni, kommunalbestyrelsip taarsigassarsisumut nammeneq kajumissutsimik isumaqatigiissuteqarniarsimanera iluatsissimannngippat,
- 7) taarsigassarsisoq piginnittut nikinneri pillugit kommunalbestyrelsimut nalunaaruteqanngippat aamma pissutsinik utoqqatsissutaasinnaasunik peqanngippat aammalu
- 8) taarsigassarsisoq §§ 17-18-imut akerliusumik illumik sanaqataaffusumik attartortitsippat.

Imm. 2. Pissutsit aaqqinneqarnissaannut piffissami taarsigassarsisumut kommunalbestyrelsi nalunaaruteqarsinnaavoq.

§ 24. Taarsigassarsiat § 23 naapertorlugu akiligassanngortinneqarpata, illup sanaqataaffiusup tiguneqarnissaa imaluunniit taarsigassarsisup taarsigassarsiat ingerlaannartumik tamaasa akilinngippagit pinngitsaaliinikkut akitsorterussisoqarneratigut tunisisoqarnissaata piumasarinissaa pillugu kommunalbestyrelsi aalajangiisinnaavoq.

Imm. 2. Kommunalbestyrelsip illu sanaqataaffiusoq tiguppagu, kommunalbestyrelsip aamma taarsigassarsisup akornanni aningaasatigut isumannaagassat kommunalbestyrelsimit naatsorsorneqassapput.

Imm. 3. Aningaasatigut isumannaagassat piffissami kommunalbestyrelsimut tunniussivissami illup sanaqataaffiusup tunisinermi akiata nalingatut naatsorsorneqassapput, kommunalbestyrelsip akiitsut sinnerinut piumasaqaataannik ilanngarlugit. Nikingassutaasut taarsigassarsisumut iluaqutaasut tunniunneqassapput. Nikingassutaasut kommunalbestyrelsimut iluaqutaasut 0 kr.-imut appartinneqassapput.

Imm. 4. Illumi sanaqataaffiusumi kommunalbestyrelsip taarsigassarsiarititaannit siulliullugit akilerneqartussanik qularnaveeqqusiussaqaarluni taarsigassarsianik nalunaarsorsimasoqarpat aammalu qularnaveeqqummik piginnittup kommunip illumik sanaqataaffiusumik tigusinissaanut ilaatillugu qularnaveeqqutip atsiornissaa itigartippagu, kommunalbestyrelsip illu sanaqataaffiusoq tigusinnaanngilaa.

Imm. 5. Kommunalbestyrelsi illumik sanaqataaffiusumik utertitamik, pisortat illumik qularnaveeqquteqarfigisaannik tunisinermi, illup nalinganut tunineqarnissaanik, taamaattorli minnerpaamik illup teknikkimut aningaasaqarnermullu tunngasortaata nalinganit akikinnerusumik tunisisoqartannginnissaanik qulakkeerissaaq.

Kapitali 4

Allaffissorneq

Akitsuutit

§ 25. Inatsisartut inatsisaat manna malillugu suliamik suliarinninnermi aningaasartuutitut matussutitut kommunalbestyrelsip taarsigassarsisitsinerata 0,5 procentit akiliutit akileqqu-neqarsinnaapput.

Imm. 2. Taarsigassarsinissamut neriorsuineq akuerineqarpat taarsigassarsisup akiliutit kommunalbestyrelsimut akilissavaa.

§ 26. Qularnaveeqqusiussaqaarluni taarsigassarsinermi allagartap atsiorneqarneranut atatillugu suliamik suliarinninnermut 1.250 kr.-nik akiliummik kommunalbestyrelsi akileeqqusisinnaavoq.

Imm. 2. Qularnaveeqqusiussaqaarluni taarsigassarsinermi allagartap imminut sinnerluni atsiorneqarnerata isumagineqarnissaanut aamma imm. 1 naapertorlugu tamatumunnga akiliummik akileeqqusinissamut aningaaserivik ataaseq arlallilluunniit kommunalbestyrelsimit piginnaatinneqarsinnaapput.

Suliakkiisarneq

§ 27. Kommunalbestyrelsip inissiaatileqatigiiffimmut kommunimit imaluunniit Namminersorlutik Oqartussanit pigineqartumut isumaqatigiissuteqarnermigut, ingerlatseqatigiiffik inissianik aqutsisoq Inatsisartut inatsisaat manna malillugu aqutsinissamut piginnaatissinnaavaa. Kommunalbestyrelsip suliaqkiineq tamanna ingerlatseqatigiiffimmut pisussaaffittut suliaqkiissutigisinnaavaa.

Imm. 2. Inissiaatileqatigiiffik imm. 1 naapertorlugu kommunalbestyrelsi sinnerlugu inatsisip matuma allaffissornikkut aquneqarneranut atatillugu aalajangiisinnaavoq, tassungalu ilanngullugu akitsuutiniq akiliisitsisarnermik isumaginnissinnaalluni.

Imm. 3. Kommunalbestyrelsi inissiaatileqatigiiffimmut ilitersuisinnaatitaavoq nakkutilliisussaallunilu.

Taarsigassarsinissamut qinnuteqarneq

§ 28. Illumik sanaqataaffusumik pissarsinissamut taarsigassarsinissaq pillugu qinnuteqaat allaganngorlugu kommunalbestyrelsimut nassiunneqassaaq.

Imm. 2. Qinnuteqaammut ilanngunneqarsimassapput:

- 1) illumut sanaqataaffusumut kissaatigineqartumut nassuiaat,
- 2) nunaminertamik qinnuteqarnerup assilineri,
- 3) nammineq aningaasalersuinerup pissarsiarineqarsinnaaneranut uppersaasat,
- 4) pilersaarutaasumik piffissakkaartumillu aserfallatsaaliinissamut qinnuteqartup aningaasartuuteqarsinnaaneranut uppersaasat aammalu
- 5) qinnuteqartup cpr. normua aamma najugaqarneranut allagartaa.

§ 29. Kommunalbestyrelsi qinnuteqartup akiliisitsiniarnermut oqartussami pisortanut akiitsui, imaluunniit inissianik aqutsisumi qinnuteqartup attartortitsisumut akiitsui pillugit oqaaseqaammik piniarsinnaanissaanut, qinnuteqartoq kommunalbestyrelsimut akuersissummik tunniussissaaq.

Imm. 2. § 28 naapertorlugu kommunalbestyrelsi taarsigassarsinissamut qinnuteqaammik tigusinerminni erngerluni qinnuteqartup pisortanut akiitsoqarnera pillugu Akiliisitsiniartarnermi Oqartussaniit aamma pisortat inissianik attartortittagaannik aqutsisumiit oqaaseqaammik pissarsiniassaaq.

Imm. 3. Kommunalbestyrelsi qinnuteqartumut, pisortanut 25.000 koruunit sinnerlugit akilerneqanngitsunik akiitsoqartumut taarsigassarsititsinissamik neriorsuuteqarsinnaanngilaq.

§ 30. Kommunalbestyrelsip suliamik suliarinninnermini, allatut isumaqatigiissuteqartoqarsimanngippat, § 29 naapertorlugu qinnuteqartoq suleqatigalugu suliaq isumagissavaa.

Imm. 2. Toqqavissap sanaartorneranut, illu suliarineqanngitsoq, innaallagissamik VVS-imillu ikkussuinerit, ilitersuisumik ikiorteqarneq pillugit neqeroorutiniq kiisalu sanaartorfigissaanermut aamma pisortat piumasaat malillugit innaallagissamut, imermut kuuffinnullu atassusernermut aningaasartuutitut missingiummik kommunalbestyrelsi pissarsiniassaaq.

Imm. 3. Ikuallattoornissamut illullu ajoqusersinnaaneranut sillimasiisoqarnissaanut sillimasiisarfiimiit neqeroorummik kommunalbestyrelsi pissarsiniassaaq, qinnuteqartoq aamma nammineerluni neqeroorummik piniarnissamik periarfissaqarpoq.

§ 31. Illumi sanaqataaffusumi sanaartornermi aningaasartuutit taarsigassarsiarineqarsinnaasut tamarmiisut pillugit missingersuummik kiisalu pilersaarutaasumik piffissakkaartumik

aserfallatsaaliinissamut pilersaarut tunngavigalugu ingerlatsinermut missingersuummik kommunalbestyrelsi suliaqassaaq.

§ 32. Missingersuummik ingerlatsinermi missingersuummik qinnuteqartumit akuerisassan-ngortitanik kommunalbestyrelsi saqqummiussissaaq. Matuma kingorna taarsigassarsisup nammineq akilersuinissaanut qularnaveeqqut apeqqutaatillugu taarsigassarsinissamut neriorsuummik kommunalbestyrelsi qinnuteqartumut nalunaaruteqassaaq.

Kapitali 5

Taarsigassarsianik tunniussineq

§ 33. Nassiunneqartussatut tunniussineq pillugu uppersaasaasiinikkut atortunik pilersuisumut kommunalbestyrelsip taarsigassarsisitsinera tunniunneqassaaq.

Imm. 2. Suliap suliarineqarsimaneranut uppersaateqartumik toqqavissap sanaartornissaanut, illu suliarineqanngitsoq, innaallagissamik VVS-imillu ikkussuinerit, ilitersuisumik ikiorteqarnek pillugit taarsigassarsiat sanasumut pineqartumut akilernerqassapput.

Imm. 3. Imm. 1-imit aamma 2-mit allaanerusunik taarsigassarsianik tunniussineq pillugu maleruagassat ilanngullugit taarsigassarsiat tunniunneqarneri pillugit malittarisassanik Naalakkersuisut aalajangersaasinnaapput.

§ 34. Illu sanaqataaffiusoq, taarsigassarsisitsiffiusoq qaqugukkulluunniit ikuallattoornissamut illullu ajoqusersinnaaneranut sillimmaserneqarsimassaaq, aamma sanaartornerata nalaani.

Imm. 2. Ikuallattoornissamut illullu ajoqusersinnaaneranut sillimmasiisoqarsimaneranut uppersaateqanngitsunik aamma akiliinissamut kinguaattoorfunngitsunut taarsigassarsianik kommunalbestyrelsi tunniussisinnaanngilaq.

Imm. 3. Sillimmasiisarfiup sillimmasiissummut akiliutissaq akilernerqarsimanngitsoq pillugu kommunalbestyrelsi nalunaarfigisinnaavaa.

Kapitali 6

Qanoq ittuuneranik akuersineq

§ 35. Illup sanaqataaffiusup qanoq ittuuneranik akuersinermik ukiumik ataatsimik sivilissusilimmik atuuttumik Naalakkersuisut nalunaaruteqartassapput. Aaqqissugaaneranut, atornerqarneranut teknikkikkullu ikkussuussinernut piumasaqaatinik Naalakkersuisut aalajangersaasinnaapput.

Imm. 2. Illup qanoq ittuuneranik akuersisoqarnissaa pillugu qinnuteqaat illup sanaqataaffiusup ukiuni siullerni 20-ni naafferartumik aserfallatsaaliornissaanut pilersaarummik imaqassaaq. Pilersaarummi ukiuni siullerni 20-ni naafferartumik aserfallatsaaliinissamut pilersaarutigineqartunut ukiumut aningaasartuutit missiliornerinik naatsorsugaqassaaq.

Kapitali 7

Atulernissaanut ikaarsaariarnermilu aalajangersakkat

§ 36. Inatsisartut inatsisaat manna ulloq 1. januar 2019 atuutilerpoq.

Imm. 2. Peqatigisaanik Inissialiornermut, illunut ataatsimoorussanut, illuliassanut il.il. tapersiissuteqartarneq pillugu Inatsisartut peqqussutaat nr. 11, 19. november 2007-imeersumi §§ 47-63 atorunnaarsinneqarput.

Namminersorlutik Oqartussat, ulloq 3. december 2018

Kim Kielsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut